

Tikinnermi nioqqutissanik akitsuuteqanngitsunik eqqussisinnaaneq pillugu Namminersorlutik Oqartussat nalunaarutaat

Nioqqutissanik eqqussuineq annissuinerlu pillugit Inatsisartut inatsisaanni nr. 18, 30. oktober 1992-imeersumi § 17 aamma § 46 naapertorlugit aalajangersarneqarput:

Tikinnerq

§ 1. Tikinnerq tassaavoq nunanit allanit, tassunga ilanngullugit Danmarkimit Savalimmiunillu, akitsuuteqarfiusumut tikinnerq.

Imm. 2. Tikinnermi angalasut nioqqutissat tulliini taagorneqartutulli annertussuseqartut akitsuuteqanngitsumik nassatarisinnaavaat pisiarisinnaallugilluunniit:

- 1) Sikaritsit 40-t imaluunniit sikaat 5-t imaluunniit cigarillot 10-t imaluunniit tupat 50 g,
- 2) Sikaritsinut imusivissat imaluunniit pappiarartassat immertariaannaat 100-t,
- 3) Imeruersaatit kulisyretallit 2 literi,
- 4) Tipigissaat 50 g aamma 0,25 literi tipigissoq. Tamakkua saniatigut pinnerasaatit tipigissullu allat katillugit annerpaamik 1.000 koruunit nalingannut,
- 5) Sukkulaatinit mamakujuttunillu nioqqutissiat katillugit 4 kg,
- 6) Kaffit imaluunniit tiit 4 kg, aamma
- 7) Neqi, neqinit nioqqutissiat imaluunniit timmissat katillugit 5 kg.

Imm. 3. Inuit 18-inik ukioqalereersimasut kisimik tupanit nioqqutissianik akitsuuteqanngitsunik eqqussisinnaapput.

§ 2. Nioqqutissanik akitsuuteqanngitsunik tikittunut nioqquteqarneq § 1, imm. 1 aamma 2, nr. 3-miit 7-imut naapertorlugit pissaaq, mittarfinnilu niuertarfinni taamakkuninnga nioqquteqarnissamut Akileraaruseriffup akuerisaani taamaallaat pisinnaalluni.

Angallassinermi sulisuusut

§ 3. Angallassinermi sulisuusut, tassa imaappoq umiarsuarni timmisartunilu nunat tamalaat akornanni angalasuni angallassissutip ingerlanneqarnerani imaluunniit taassuma iluani suliaqartut, ullut unnuallu 15-it inorlugit sivisussusilimmik Kalaallit Nunaata avataaniikkallarnerup kingorna uternerminni makkuninnga nassarsinnaapput:

- 1) Sikaritsit 20-t imaluunniit sikaat 5-t imaluunniit cigarillot 10-t imaluunniit tupat 35 g,
- 2) Tipigissaat 50 g aamma 0,25 literi tipigissoq.

Imm. 2. Angallassinermi sulisuusut ulluni unnuanilu 15-ini taakkuluunniit sinnerlugit Kalaallit Nunaata

avataaniikkallernerup kingorna tikinnerminni § 1-imi maleruagassat naapertorlugit nioqqutissanik nassarsinnaapput.

Sinerissap avataani qillerivinni sulisuusut

§ 4. Sinerissap avataani qillerivinni, matumani aamma qilleriviusuni kiisalu uuliamik qalluivinni sulisuusut, aatsitassanik imaluunniit ikummatissanik misissueqqaarnermut, misissuinermut qalluinernullu atatillugu sulisut akitsuuteqarfusup iluani niunerminni akitsuuteqanngitsumik nassarsinnaavaat:

1) Sikaritsit 20-t imaluunniit sikaat 5-t imaluunniit cigarillot 10-t imaluunniit tupat 35 g.

Imm. 2. Akitsuuteqannginnissami piumasaqaataavoq ulluni unnuanilu minnerpaamik 15-ini akitsuuteqarfusup avataaniikkallarsimanissaq.

Imm. 3. Imm. 1 naapertorlugu akitsuuteqannginnissaq taamaallaat nioqqutissanut akitsuuteqarfusup avataani pisiarinqarsimasunut atuuppoq.

Angallatit aalisariutit nunanit allaneersut

§ 5. Angallatinut aalisariutinut nunanit allaneersunut Kalaallit Nunaata imartaani aalisartunut, aammalu umiarsuarnut Kalaallit Nunaata imartaaniinnerminni akitsuutinik akiliisussaatinneqanngitsunut tunngatillugu, nioqqutissat umiarsuarmi nassarneqartut inuttamut ataatsimut ullup unnuallu ataatsip ingerlanerani akitsuuteqanngitsumik atorineqarsinnaapput: viinni 1 liter, imaluunniit hedviinni 0,5 liter, imaluunniit imigassaq kimittooq 0,25 liter imaluunniit immiaaqqat 2 liter kiisalu tupanit nioqqutissiat 40 g, siviunerpaamik ulluni 28-ni.

Imm. 2. Umiarsuarni inuttaasut, imm. 1 naapertorlugu nioqqutissanik akitsuusigaanngitsunik pissarsisimasut, akitsuuteqarfusumiit aallarnissartik pissutigalugu umiarsuarmiit niusimasut nioqqutissanik akitsuusigaanngitsunik § 3-mi annertussusissatut aalajangersakkat annertoqqataannik nassarsinnaapput.

Imm. 3. Imm. 1 naapertorlugu akitsuuteqannginnissaq taamaallaat nioqqutissanut, umiarsuup akitsuuteqarfusup avataani pisiarisimasaanut atuuppoq.

Takornariat nunat allamiut umiarsuaannut ilaasartaatinut ilaasut

§ 6. Takornariat nunat allamiut umiarsuaannut ilaasartaatinut ilaasut umiarsuup Kalaallit Nunaata imartaaniinnerani akitsuusigaanngitsunik atugaqarsinnaatitaapput.

Imm. 2. Takornariat imm. 1 naapertorlugu akitsuusigaanngitsunik atugaqartut tupanit, sukkulaatinit aamma mamakujuttunit nioqqutissiat nammineq atugassamik saniatigut nioqqutissanik akitsuusigassanik nunaliaasseqqusaanngillat. Angerlamut angalaneeq Kalaallit Nunaat aqqusaarlugu aallartippat takornariat nioqqutissanik akitsuuteqanngitsunik § 1 naapertorlugu nassarsinnaapput.

Imm. 3. Imm. 1 naapertorlugu akitsuuteqannginnissaq taamaallaat nioqqutissanut, umiarsuup akitsuuteqarfusup avataani pisiarisimasaanut atuuppoq.

Inuit akitsuuteqarfusumi aalajangersimasumik najugaqanngitsut najugaqarallartuunngitsulluunniit

§ 7. Inuit akitsuuteqarfusumi aalajangersimasumik najugaqanngitsut najugaqarallartuunngitsulluunniit angalanerni nammineq atugassatut akitsuuteqanngitsumik eqqussinnaavaat tipigissaatit, pinnersaatit tipigissullu, nioqqutissanik eqqussuinermi akitsuutit pillugit Inatsisartut inatsisaanni nr. 19, 30. oktober

1992-meersumi § 1, nr. 18 naapertorlugu akitsuusigassaasut, Akileraaruseriffiup taakkua annertussusii suunerilu piffissap angalaffissap sivilissusianut naleqquttuursorippagit.

Akitsuuteqannginnissamut piumasaqaat

§ 8. § 1 aamma §§-it 3-miit 6-imut malillugit akitsuuteqannginnissamut piumasaqaataavoq nioqqutissat imaluunniit angalanermi atortut inummit nassarneqarnissaat imaluunniit inuup nammineq nassataaniitinneqarnissaat, taamaalillugit nioqqutissat imaluunniit angalanermi atortut Akileraaruseriffimmut takutinneqarsinnaanngorlugit.

Nakkutilliineq

§ 9. Suliffeqarfiit nioqqutissanik akitsuusigaanngitsunik tikittunut nioqquteqarnissamut akuersisummik peqartut, tak. § 2, imigassanik aalakoornartortalinnik kiisalu tupanit nioqqutissianik tunisaqarnerminni piumasarisassavaat angalasup ikilernermit allagartaq, aallalernerminut uppersaatitut takutissagaa.
Imm. 2. Ikilernermit allagartap imm. 1-imi taaneqartutut takutinneqarnerani, ikilernermit allagartaq nalunaaqutserneqassaaq imaluunniit allagartap imigassanik aalakoornartortalinnik imaluunniit tupanit nioqqutissianik pisinermi atorneqarsimanera arlaatigut takussutissinneqassalluni.
Imm. 3. Ikilernermit allagartat imm. 2-mi taaneqartut imigassanik aalakoornartunik tupanillu nioqqutissianik pisinermut atoqqinneqarsinnaanngillat.

Pineqaatissiinerit

§ 10. § 1, imm. 2-miit 3-mut, § 2-mi, § 3, imm. 1-imi, § 4, imm. 1-imi 3-milu, § 5, imm. 1-imiit 2-mut, § 6, imm. 2-mi, § 7-imi aamma § 8-mi aalajangersakkanik piaarluneerluni mianersuaalliorujussuarluniluunniit unioqqutitsisoq unioqqutitserialuartorluunniit Kalaallit Nunaanni pinerluttulerinermik inatsimmi maleruagassat naapertorlugit akiliisitsinermik pineqaatissinneqarsinnaavoq.
Imm. 2. Imm. 1-imi taaneqartutut unioqqutitsisoqarpat unioqqutitserialuartoqarpalluunniit nioqqutissaq, taannaluunniit peqanngippat aningaasat taassuma aningaasanngorlugu nalingata amerlaqatai, akiliisitsinermik pineqaatissiisoqarpat pineqaatissiisoqanngikkaluarpalluunniit, Kalaallit Nunaanni pinerluttulerinermik inatsimmi maleruagassat naapertorlugit arsaarinnissutigineqarsinnaapput.
Imm. 3. Imm. 1 naapertorlugu akiliisitsissutit Landskarsip pisassarai.
Imm. 4. Imm. 2 naapertorlugu arsaarinnissutit Landskarsip pisassarai.

Atortuulerfia

§ 11. Nalunaarut manna 1. januar 2011-mi atortuulissaaq.
Imm. 2. Tamatumunnga peqatigitillugu atorunnaarsinneqarpoq tikinnermi nioqqutissanik akitsuuteqanngitsunik eqqussisinnaaneq pillugu nalunaarut nr. 17, 2. december 2004-meersoq.

Kalaallit Nunaanni Namminersorlutik Oqartussat, ulloq 20. december 2010

Palle Christiansen

/

Jan H. Lyng-Pedersen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut